



中国经典名著

# 全唐诗

(三十)

黄怀仁 齐思明 校正

学苑音像出版社

## 目 录

第五百四十九卷.....	1
第五百五十卷.....	42
第五百五十一卷.....	74
第五百五十二卷.....	84
第五百五十三卷.....	97
第五百五十四卷.....	108
第五百五十五卷.....	135
第五百五十六卷.....	155
第五百五十七卷.....	182
第五百五十八卷.....	195
第五百五十九卷.....	213
第五百六十卷.....	232
第五百六十一卷.....	258
第五百六十二卷.....	282
第五百六十三卷.....	293
第五百六十四卷.....	303
第五百六十五卷.....	309

## 第五百四十九卷

汾上宴别（一作许浑诗）

赵嘏

云物如故乡，山川知异路。年来未归客，马上春色暮。  
一尊花下酒，残日水西树。不待管弦终，摇鞭背花去。

书斋雪后

赵嘏

拥褐坐茅檐，春晴喜初日。微风入桃径，爽气归缥帙。  
频时苦风雪，就景理巾栉。树暖高鸟来，窗闲曙云出。  
乡遥路难越，道蹇时易失。欲静又不能，东山负芝朮。

寄道者

赵嘏

洞庭先生归路长，海云望极春茫茫。  
别来几度向蓬岛，自傍瑶台折灵草。



虎丘寺赠渔处士

赵嘏

兰若云深处，前年客重过。岩空秋色动，水阔夕阳多。  
早负江湖志，今如鬓发何。唯思闲胜我，钓艇在烟波。

陪崔璞侍御和崔 春日有怀

赵嘏

诗家本多感，况值广陵春。暖驻含窗日，香馀醉袖尘。  
浮名皆有分，一笑最关身。自此容依托，清才两故人。

昔昔盐二十首（以薛道衡诗每句为题）。垂柳覆金堤

赵嘏

新年垂柳色，袅袅对空闺。不畏芳菲好，自缘离别啼。  
因风飘玉户，向日映金堤。驿使何时度，还将赠陇西。

昔昔盐二十首。靡芜叶复齐

赵嘏

提筐红叶下，度日采靡芜。掬翠香盈袖，看花忆故夫。  
叶齐谁复见，风暖恨偏孤。一被春光累，容颜与昔殊。



昔昔盐二十首。水溢芙蓉沼

赵嘏

渌沼春光后，青青草色浓。绮罗惊翡翠，暗粉妒芙蓉。  
云遍窗前见，荷翻镜里逢。将心托流水，终日渺无从。

昔昔盐二十首。花飞桃李蹊

赵嘏

远期难可托，桃李自依依。花径无容迹，戎裘未下机。  
随风开又落，度日扫还飞。欲折枝枝赠，那知归不归。

昔昔盐二十首。采桑秦氏女

赵嘏

南陌采桑出，谁知妾姓秦。独怜倾国貌，不负早莺春。  
珠履荡花湿，龙钩折桂新。使君那驻马，自有侍中人。

昔昔盐二十首。织锦窦家妻

赵嘏

当年谁不羨，分作窦家妻。锦字行行苦，罗帏日日啼。  
岂知登陇远，只恨下机迷。直候阳关使，殷勤寄海西。



昔昔盐二十首。关山别荡子

赵嘏

那堪闻荡子，迢递涉关山。肠为马嘶断，衣从泪滴斑。  
愁看塞上路，讵惜镜中颜。傥见征西雁，应传一字还。

昔昔盐二十首。风月守空闺

赵嘏

良人犹远戍，耿耿夜闺空。绣户流宵月，罗帏坐晚风。  
魂飞沙帐北，肠断玉关中。尚自无消息，锦衾那得同。

昔昔盐二十首。恒敛千金笑

赵嘏

玉颜恒自敛，羞出镜台前。早惑阳城客，今悲华锦筵。  
从军人更远，投喜鹊空传。夫婿交河北，迢迢路几千。

昔昔盐二十首。长垂双玉啼

赵嘏

双双红泪堕，度日暗中啼。雁出居延北，人犹辽海西。  
向灯垂玉枕，对月洒金闺。不惜罗衣湿，惟愁归意迷。



昔昔盐二十首。蟠龙随镜隐

赵嘏

鸾镜无由照，蛾眉岂忍看。不知愁发换，空见隐龙蟠。  
那惬红颜改，偏伤白日残。今朝窥玉匣，双泪落阑干。

昔昔盐二十首。彩凤逐帷低

赵嘏

巧绣双飞凤，朝朝伴下幔。春花那见照，暮色已频欺。  
欲卷思君处，将啼裛泪时。何年征戍客，传语报佳期。

昔昔盐二十首。惊魂同夜鹊

赵嘏

万里无人见，众情难与论。思君常入梦，同鹊屡惊魂。  
孤寝红罗帐，双啼玉箸痕。妾心甘自保，岂复暂忘恩。

昔昔盐二十首。倦寝听晨鸡

赵嘏

去去边城骑，愁眠掩夜闺。披衣窥落月，拭泪待鸣鸡。  
不愤连年别，那看长夜啼。功成应自恨，早晚发辽西。



昔昔盐二十首。暗牖悬蛛网

赵嘏

暗中蛛网织，历乱绮窗前。万里终无信，一条徒自悬。  
分从珠露滴，愁见隙风牵。妾意何聊赖，看看剧断弦。

昔昔盐二十首。空梁落燕泥

赵嘏

春至今朝燕，花时伴独啼。飞斜珠箔隔，语近画梁低。  
帷卷闲窥户，床空暗落泥。谁能长对此，双去复双栖。

昔昔盐二十首。前年过代北

赵嘏

代北几千里，前年又复经。燕山云自合，胡塞草应青。  
铁马喧鼙鼓，蛾眉怨锦屏。不知羌笛曲，掩泪若为听。

昔昔盐二十首。今岁往辽西

赵嘏

万里飞书至，闻君已渡辽。只谙新别苦，忘却旧时娇。  
烽戍年将老，红颜日向凋。胡沙兼汉苑，相望几迢迢。



昔昔盐二十首。一去无还意

赵嘏

良人征绝域，一去不言还。百战攻胡虏，三冬阻玉关。  
萧萧边马思，猎猎戍旗闲。独抱千重恨，连年未解颜。

昔昔盐二十首。那能惜马蹄

赵嘏

云中路杳杳，江畔草凄凄。妾久垂珠泪，君何惜马蹄。  
边风悲晓角，营月怨春鼙。未道休征战，愁眉又复低。

送韦处士归省朔方

赵嘏

映柳见行色，故山当落晖。青云知己歿，白首一身归。  
满袖萧关雨，连沙塞雁飞。到家翻有喜，借取老莱衣。

送权先辈归覲信安

赵嘏

衣彩独归去，一枝兰更香。马嘶芳草渡，门掩百花塘。  
野色亭台晚，滩声枕簟凉。小斋松岛上，重叶覆书堂。



风蝉

赵嘏

风蝉旦夕鸣，伴夜送秋声。故里客归尽，水边身独行。  
噪轩高树合，惊枕暮山横。听处无人见，尘埃满甑生。

重寄卢中丞

赵嘏

贱子来还去，何人伴使君。放歌迎晚醉，指路上高云。  
此夜雁初至，空山雨独闻。别多头欲白，惆怅惜馀醺。

晓发（一作姚鹄诗）

赵嘏

旅行宜早发，况复是南归。月影缘山尽，钟声隔浦微。  
星残萤共映，叶落鸟惊飞。去去渡南渚，村深人出希。

送友人郑州归觐

赵嘏

为有趋庭恋，应忘道路赊。风消荥泽冻，雨静圃田沙。  
古陌人来远，遥天雁势斜。园林新到日，春酒酌梨花。



洛中逢卢郢石归覲

赵嘏

不堪俱失意，相送出东周。缘切倚门恋，倍添为客愁。  
春山和雪静，寒水带冰流。别后期君处，灵源紫阁秋。

赠越客

赵嘏

故国波涛隔，明时心久留。献书双阙晚，看月五陵秋。  
南棹何当返，长江忆共游。定知钓鱼伴，相望在汀州。

经无锡县醉后吟

赵嘏

客过无名姓，扁舟系柳阴。穷秋南国泪，残日故乡心。  
京洛衣尘在，江湖酒病深。何须觅陶令，乘醉自横琴。

东归道中二首

赵嘏

平生事行役，今日始知非。岁月老将至，江湖春未归。  
传家有天爵，主祭用儒衣。何必劳知己，无名亦息机。



未明唤僮仆，江上忆残春。风雨落花夜，山川驱马人。  
星星一镜发，草草百年身。此日念前事，沧洲情更亲。

旅次商山

赵嘏

役役依山水，何曾似问津。断崖如避马，芳树欲留人。  
日夕猿鸟伴，古今京洛尘。一枝甘已失，辜负故园春。

长洲

赵嘏

扁舟殊不系，浩荡路才分。范蠡湖中树，吴王苑外云。  
悲心人望月，独夜雁离群。明发还驱马，关城见日曛。

江边

赵嘏

终日劳车马，江边款行扉。残花春浪阔，小酒故人希。  
戍鼓客帆远，津云夕照微。何由兄与弟，俱及暮春归。



宿灵岩寺（即古吴官）

赵嘏

明月溪头寺，虫声满橘洲。倚栏香径晚，移石太湖秋。  
古树云归尽，荒台水更流。无人见惆怅，独上最高楼。

越中寺居

赵嘏

迟客疏林下，斜溪小艇通。野桥连寺月，高竹半楼风。  
水静鱼吹浪，枝闲鸟下空。数峰相向绿，日夕郡城东。

赠金刚三藏（一作许浑诗）

赵嘏

心法云无住，流沙归复来。锡随山鸟动，经附海船回。  
洗足柳遮寺，坐禅花委苔。惟将一童子，又欲过天台。

长安晚秋（一作秋望，一作秋夕）

赵嘏

云物凄凉拂曙流，汉家宫阙动高秋。残星几点雁横塞，  
长笛一声人倚楼。紫艳半开篱菊静，红衣落尽渚莲愁。



鲈鱼正美不归去，空戴南冠学楚囚。

齐安早秋

赵嘏

流年堪惜又堪惊，砧杵风来满郡城。高鸟过时秋色动，  
征帆落处暮云平。思家正叹江南景，听角仍含塞北情。  
此日沾襟念岐路，不知何处是前程。

东望

赵嘏

楚江横在草堂前，杨柳洲西载酒船。两见梨花归不得，  
每逢寒食一潸然。斜阳映阁山当寺，微绿含风月满川。  
同郡故人攀桂尽，把诗吟向沅寥天。

长安月夜与友人话故山（一作旧山，一作故人）

赵嘏

宅边秋水浸苔矶，日日持竿去不归。杨柳风多潮未落，  
蒹葭霜冷雁初飞。重嘶匹马吟红叶，却听疏钟忆翠微。  
今夜秦城满楼月，故人相见一沾衣。



题横水驿双峰院松（一作横水馆双松）

赵嘏

故园溪上雪中别，野馆门前云外逢。白发渐多何事苦，  
清阴长是好相容。迎风几拂朝天骑，带月犹含度岭钟。  
更忆葛洪丹井畔，数株临水欲成龙。

发剡中（武德中置嵊州）

赵嘏

正怀何谢俯长流，更览馀封识嵊州。树色老依官舍晚，  
溪声凉傍客衣秋。南岩气爽横郭郭，天姥云晴拂寺楼。  
日暮不堪还上马，蓼花风起路悠悠。

登安陆西楼

赵嘏

楼上华筵日日开，眼前人事只堪哀。征车自入红尘去，  
远水长穿绿树来。云雨暗更歌舞伴，山川不尽别离杯。  
无由并写春风恨，欲下郢城首重回。



九日陪越州元相燕龟山寺

赵嘏

佳晨何处泛花游，丞相筵开水上头。双影旆摇山雨霁，  
一声歌动寺云秋。林光静带高城晚，湖色寒分半槛流。  
共贺万家逢此节，可怜风物似荆州。

经汉武泉

赵嘏

芙蓉苑里起清秋，汉武泉声落御沟。他日江山映蓬鬓，  
二年杨柳别渔舟。竹间驻马题诗去，物外何人识醉游。  
尽把归心付红叶，晚来随水向东流。

曲江春望怀江南故人

赵嘏

杜若洲边人未归，水寒烟暖想柴扉。故园何处风吹柳，  
新雁南来雪满衣。目极思随原草遍，浪高书到海门希  
此时愁望情多少，万里春流绕钓矶。



上令狐相公

赵嘏

鸱在卿云冰在壶，代天才业奉訏谟。荣同伊陟传朱户，  
秀比王商入画图。昨夜星辰回剑履，前年风月满江湖。  
不知机务时多暇，犹许诗家属和无。

忆山阳

赵嘏

家在枚皋旧宅边，竹轩晴与楚坡连。芰荷香绕垂鞭袖，  
杨柳风横弄笛船。城碍十洲烟岛路，寺临千顷夕阳川。  
可怜时节堪归去，花落猿啼又一年。

二（一作寒食遣怀）

赵嘏

折柳城边起暮愁，可怜春色独怀忧。伤心正叹人间事，  
回首更惭江上鸥。鶗鴂声中寒食雨，芙蓉花外夕阳楼。  
凭高满眼送清渭，去傍故山山下流。

